

## 遵訓終隱

宋，清素，得法於慈明。在處隱眾中，兜率悅公時在眾，因夜話，詢知為慈明侍者，大驚。明日具威儀參叩，往復開發，遂得大悟。仍戒悅曰：「吾以福薄，先師授記，不許為人；憐子之誠，忘先師之戒，子以後切勿嗣吾也。」終身陸沈，人無知者。

## 兵難不離

元，印簡，山西寧遠人。八歲禮中觀沼公為師，十八，元兵下寧遠，四眾逃難，簡侍中觀如故。觀曰：「吾迫桑榆，汝方富有春秋，何當玉石俱焚？宜自逃遁。」簡泣曰：「因果無差，死生有命，安可離師苟免乎？」明日城降，元帥史公天澤問曰：「汝何人？」對曰：「沙門。」「食肉否？」對曰：「何肉？」史曰：「人肉。」對曰：「虎豹尚不相食，況人乎？」史喜而釋之。

## 總論

古之為弟子者，師歿而信愈堅；今之為弟子者，師存而守已易，所以者何？良繇最初出家，實非欲依止真師，決擇生死，蓋一時偶合而已。是以其心見利則易，逢惡友惑之則易，瞋其師之訓以正也則易；甚而下喬入幽如陳相，罷釋事道如靈素者有之矣！又甚而太陽平侍者之流，未必其無人矣！嗟乎！悲哉！